

**Tiada habuan Lee lepas jawatan Adun Kajang, kata Anwar
Malaysian Insider
Feb 5, 2014
OLEH MOHD FARHAN DARWIS**

Datuk Seri Anwar Ibrahim menegaskan tiada sebarang habuan diberikan kepada mantan Ahli Dewan Undangan Negeri (Adun) Kajang, Lee Chin Cheh kerana mengosongkan kerusinya.

Anwar berkata, antara syarat yang dikenakan untuk Lee melepaskan jawatan hanyalah Anwar akan menggantikan beliau di kerusi berkenaan.

"Beliau tanya jika jawatan itu dilepaskan adakah saya akan ganti, saya kata betul... tapi tiada sebarang habuan kita janjikan," kata Anwar memberi penjelasan di hadapan lebih 100 penyokong PKR di majlis "Hi-Tea Anwar bersama pengundi di Pusat Komuniti DUN Kajang", di Taman Sungai Sekamat, Kajang petang tadi.

Anwar turut mengakui, beliau tidak begitu mengenali Lee, namun tindakan Lee yang sanggup melepaskan jawatan demi parti adalah tindakan terpuji.

"Saya tidak berapa kenal Lee, tetapi saya terpaksa akui, jarang ada pemimpin yang begitu baik," katanya.

Tindakan Lee melepaskan jawatan sebagai Adun Kajang mengejutkan banyak pihak, lebih-lebih lagi tiada alasan konkrit diberikan ekoran tindakannya itu.

PKR bagaimanapun memberi alasan tindakan Lee melepaskan jawatan adalah untuk membolehkan beliau bertanding di kerusi berkenaan, sekaligus menghalang usaha sabotaj Umno bagi merampas Selangor daripada Pakatan Rakyat dengan menggunakan ketegangan kaum dan agama.

Ahli Parlimen Permatang Pauh itu menjelaskan, dengan terlibat secara langsung dalam urusan pentadbiran negeri, kerajaan Selangor akan mampu menangkis sebarang cubaan Umno merampas negeri terkaya di negara itu.

"Perlu kita tentukan kerajaan Selangor dipertahankan dari segala percubaan," kata Anwar dalam ucapannya.

"Mereka tuduh kita korbakan Islam. Kita jual nama Allah. Seolah-oleh kita khianat bangsa," katanya.

Meskipun PKR menggunakan alasan langkah berkenaan sebagai "strategi politik", pengkritik melihat langkah meletakkan Anwar dalam pentadbiran negeri adalah untuk meredakan krisis antara Menteri Besar Tan Sri Abdul Khalid Ibrahim dan juga Timbalan Presiden PKR Mohamed Azmin Ali.

Suruhanjaya Pilihan Raya (SPR) menetapkan 23 Mac depan sebagai tarikh mengundi bagi Pilihan Raya Kecil DUN Kajang. – 5 Februari, 2014.

Hakcipta © 2013 The Malaysian Insider

Source: <http://www.themalaysianinsider.com/bahasa/article/tiada-habuan-lee-lepas-jawatan-adun-kajang-kata-anwar>